



Kamis, 14 April 2022
Ogen: Markus 14:22-26



Erbagi



Kamis Si Badia, e me sada peringet-ingeten kerna sada wari sope Jesus ngalaken kiniseran. Wari e ibabai me kita ngidah perbahenen-perbahenen Jesus. Jesus enggo meteh maka lanai ndekahsa ia ngalaken kiniseran. Situhuna, i bas kemanusiaanNa lit kebiaren. Tapi la pediatna kebiaren e engkuasai geluhNa, seh maka kesempatan si kentisik e pe ipakekenNa jadi erguna man ajar-ajar bage pe enterem jelma. Kesempatan e me ngelokoken persadan Si Badia. IbuatNa roti, icepik-cepikNa, ibagikanNa man ajar-ajarNa, ibuatNa calung ibagi-bagikanNa man ajar-ajarNa. TujunNa segelah kerina ajar-ajar man roti e, minem tare calung e. Enda pe ipake segelah bas kerina situasi ajar-ajar pe ngasup ka ngelokokenca nandangi kalak sideban.

Enda me jadi usihen, enda me jadi gelemen janah enda me jadi gegeh ajar-ajar. Kenca ngelokoken Lakon Persadan Si Badia e kerina ajar-ajar e ngendeken ende-enden pujin.

"Erbagi" sada bagin si la terpesirang i bas kegeluhen kalak si erkiniteken. Erbagi enda maba keriahen, erbagi enda erbahanca si mberat jadi menahang, maba keriahen dengen kemalemen ate. Erbagi enda maba gegeh si mbaru kap. Erbagi enda sada kiningiten (*kerelan*) *erkorban guna kiniulin si enterem*. Jesus mereken contoh erbagi. Bagikenna kerna roti ras anggur guna keselamatan enterem jelma. Gambaren kegeluhen Jesus iendesken (ibagikan) segelah kalak si tek ngaloken kinirajan Dibata. Jadi penjemba man ajar-ajar pe i bas ngalaken perbeben erkiteken ngelokoken si mehuli tetap megegeh sabap e bagin bas geluh sekalak ajar-ajar.

Nilai erbagi enda penting guna ipebelin bas kegeluhenta manusia. Kai banci si bagiken? Pemeteha, panganta, uista, kinilitenta ras sidebanna. Kai si lit i bas kita em si bagiken. Kalak si mesikel bas erbagi, itambahi Dibata tole man bana kap. Kamis Si Badia enda mabai kita ngasup erbagi aminna pe maun jadi bas paksa susah entah sangana ngalaken perbeben. perlu si inget maka tupung kita erbag, i je sialoken kesangapan.